

ԱԿԱՍԵԼ ԲԱԿՈՒՆՑԸ ՔԱՂԱՔԱԿԱՆ ԲՈՆՈՒԹՅՈՒՆՆԵՐԻ ԶՈՀ
(1936–1937 թթ.)*

ԴԱՎԻԹ ԳԱՍՊԱՐՅԱՆ

Բանալի բառեր՝ Ակսել Բակունց, քաղաքական հալածանքներ, ձերբակալություն, կալանք, հարցաքննություն, դատավճիռ, գնդակահարություն:

Նախաբան

Ակսել Բակունցը (Ալեքսանդր Թևոսյան) ծնվել է Գորիսում 1899 թ. հունիսի 13-ին (հին տոմարով՝ հունիսի 1-ին): Ընտանիքը բազմաճյուղ էր, դժվարությունների մեջ: 1905–1910 թթ. Գորիսում ծխական դպրոցն ավարտելուց հետո 1910–1917 թթ. կրթությունը շարունակել է Էջմիածնի Գևորգյան ճեմարանում: 1919–1920 թթ. ուսանել է Թիֆլիսի պոլիտեխնիկական ինստիտուտի գյուղատնտեսական բաժնում, իսկ 1920–1923-ին նույն մասնագիտությամբ կրթությունը շարունակել է Խարկովի գյուղատնտեսական ինստիտուտում: Ավարտելուց հետո նախ՝ Գորիսում, ապա՝ Երևանում աշխատել է մասնագիտությամբ:

1913-ին՝ 14 տարեկան հասակում, Թիֆլիսի «Աղբյուր» մանկական ամսագրում տպագրվում է նրա «Հիմար մարդը» հեքիաթը, որը հայտնի բանահյուսական նյութի մշակումն էր: 1915 թ. մի քանի ուշագրավ գրություններով հանդես է գալիս Շուշիի «Փայլակ» թերթում: 1915–1916 ուսումնական տարում ուսուցչություն է արել Սիսիանի Լոր գյուղում:

1917 թ. աշնանը գինավորագրվում է Տուրվեստանսկի, ապա՝ Երզնկայի գնդերին և մասնակցում Մամախաթունի, Բայբուրդի, Էրզրումի, Սարիղամիշի, Կարսի, Սելիմի, Արդահանի, Աշկալայի, Իլիջայի կռիվներին և Սարդարապատի ճակատամարտին:

1924–1925 թթ. «Մարտակոչ» և «Խորհրդային Հայաստան» թերթերում լույս են տեսնում Բակունցի «Գավառական նամականի» և «Մեր գյուղեր» ակնարկաշարերը: Ե. Չարենցն արդեն նկատել էր նրան, հանդիպումը կայանում է 1926 թ. մարտին, որից հետո Բակունցը դառնում է Չարենցի ղեկավարած «Նոյեմբեր» գրական խմբակցության անդամ: Նա արդեն լիարժեք գրական կյանքի և գործունեության մեջ էր. 1927-ին լույս են տեսնում

* Ներկայացվել է 20. VI. 2024 թ., գրախոսվել է 14. VIII. 2024 թ., ընդունվել է տպագրության 21. XI. 2024 թ.:

¹ Տե՛ս Բ ա կ ու ն ց. 1984, 386:

«Միջնաձոր» պատմվածքների ժողովածուն և «Հովնաթան Մարչ» երգիծական վիպակը:

1928 թ. մարտի սկզբին Ա. Բակունցը դիմում է ՀԿ(Բ)Կ Կենտկոմ խնդրելով իրեն ազատել հողօգտագործության գրադեցրած պաշտոնից և նվիրվելու «բացառապես գրական աշխատանքի»: Դրանից հետո նա խմբագրական աշխատանքներ է կատարում գրական մամուլում, աշխատում Հայկինոյի սցենարական բաժնում: Նրա սցենարներով (բեմադր) նկարահանվում են համր ֆիլմեր²: Գրում և տպագրում է իր պատմվածքներն ու «Կարմրաքար», «Որդի որոտման» և «Խաչատուր Աբովյան» վեպերը, որոնք մեզ են հասել այն չափով, որքանով ժամանակին տպագրվել են մամուլում:

Ա. Բակունցի վաստակն արժանիորեն գնահատվում է և՛ հայրենիքում՝ Եղիշե Զարենց, Հարություն Սուրխաթյան, Ռաֆայել Աթայան, Խորեն Սարգսյան, և՛ սփյուռքում՝ արժանանում է «Տիգրան Կամսարական» գրական մրցանակին, նրա մասին գրում են Լևոն Բաշալյանը, Շավարշ Նարդունին, Համաստեղը, Պետրոս Զարոյանը, Զապել Եսայանը:

1934 թ. հունիս-հուլիս ամիսներին միանում է գրականության լեզվի շուրջ ընթացող քննարկումներին: Նույն թվականի օգոստոսի 1–6-ին մասնակցում է Հայաստանի գրողների, իսկ օգոստոսի 17-ից սեպտեմբերի 1-ը՝ ԽՍՀՄ գրողների հիմնադիր առաջին համագումարներին և ելույթներ ունեցել: Բարձրացող տաղանդը թուիչքի մեջ էր, բայց չարամիտ բանասարկությունները կասեցրին այդ թուիչքը:

1933 թվականից Բակունցն արդեն քաղաքական մեղադրանքների թիրախ էր: Մեղադրանքների առիթ է դառնում նրա «Ծիրանի փողը» (1933) հայրենասիրական պատմվածքը, որը մեկնաբանում են որպես «նացիոնալիզմ» և «անցյալի իդեալականացում»: Հաճախակի էր հղումվում «Բակունցի խմբակ» մեղադրական արտահայտությունը: Մամուլում և ժողովներում հաճախակի են նրան քաղաքական պիտակներ հասցեագրում Նաիրի Զարյանը, Հրաչյա Քոչարը, Հարություն Մկրտչյանը, Նորայր Դաբաղյանը և ուրիշներ: Քաղաքական միջնորդոտն աստիճանաբար լարվում է և ազգային դեմք ու դիմագիծ ունեցող բոլոր գրողները ենթարկվում են մեղադրանքի, որին հաջորդում է կալանքն ու հաշվեհարդարը:

Բակունցը և դաշնակցությունը

1933 թվականից սկսած Բակունցի հասցեին հաճախակի էր հնչում «դաշնակցական» մեղադրանքը: Բացատրենք իրողությունը:

1915 թ. օգոստոսի 28-ին Բակունցը դիմում է Հայկական կենտրոնական կոմիտե՝ Հայ գաղթականներին օգնելու և հայրենիքին իր հնարավորությունների առավելագույնով ծառայելու պատրաստակամությամբ³: Դրանից հետո ընդունվում է Հայ հեղափոխական դաշնակցություն կուսակցության շարքերը:

² 1935-ից ՀԿ(Բ)Կ Կենտկոմի առաջին քարտուղար Աղասի Խանժյանի ցուցումով գրում-մշակում էր «Զանգեզուր» հնչուն ֆիլմի բեմադրը:

³ «Միջնաձոր»-ից հետո պատմվածքների ժողովածուներից հիշարժան են «Սև ցեղերի սերմնացանները» (1933), «Անձրեք» (1935), «Եղբայրության ընկուզենիներ»-ը (1936):

⁴ Բ ա կ ու ն ց. 1984, 369:

Կուսակցության եռանդուն գործիչներից է եղել մինչև 1919 թ.: 1936–1937 թթ. հարցաքննությունների ժամանակ հրաժարվել է կուսակցության անդամ լինելու փաստից և հայտարարել. «... մինչև 1917 թ. նոյեմբերը ես եղել եմ աշակերտական միության անդամ»⁵: «2. VII. 1937» թվագրությունն ունեցող նույն օրվա երկրորդ դիմումը ՀԽՍՀ ներքին գործերի ժողովրդական կոմիսար Նաչիկ Մուղդուսուն՝ ամբողջությամբ նվիրված է այդ հարցի բացահայտմանը⁶:

Այս ընթացքում 1917 թ. ապրիլի վերջին, Բակունցը Բաքվում մասնակցել է ՀՀԴ կոմիտեի շրջանային ժողովին, ղեկավարել սահմանադիր ժողովի ընտրությունները Ղափանի շրջանում: Այս ոգևորությամբ էլ՝ որպես կամավոր, 1917 թ. դեկտեմբերի 26-ին Կարինում միացել է գործող բանակին, իսկ մայիսի 21–29-ին, ինչպես նշեցինք, մասնակցել Սարդարապատի ճակատամարտին: 1918 թ. դեկտեմբեր – 1919 թ. մայիս ժամանակահատվածում եղել է Հայաստանի Հանրապետության նիստերի արձանագրող: Առանց կուսակցության անդամ լինելու՝ նրան այս գործը չէին վստահի: Նաև ավելացնենք, որ աշխատակցում էր դաշնակցության մամուլին՝ «Ժողովուրդ», «Հայաստանի աշխատավոր», «Հառաջ», «Զանգ»:

1923 թ. նոյեմբերի 20–23-ին Երևանում Բակունցը ղեկավարում է Հայաստանի նախկին դաշնակցականների լուծարային համագումարը, որի ղեկավար-կազմակերպիչն էր՝ նախագահը: Հանդես է եկել համագումարի բացման խոսքով, զեկուցմամբ: Խմբագրել է «Նախկին շարքային դաշնակցականների համահայաստանյան համագումարի արձանագրությունները» գիրքը և հետևել տպագրությանը (Երևան, 1923, 142 էջ): Համագումարի կապակցությամբ նոյեմբերի 20-ին լույս է տեսել Հայաստանի նախկին դաշնակցականների համագումարը նախապատրաստող բյուրոյի «Լրաբեր» մեկօրյա թերթը, որի հրատարակչական պատասխանատուն ևս Բակունցն էր: Թերթում զետեղված է նրա «Ուվքեր են հեռանում դաշնակցությունից» հոդվածը: Համագումարի կապակցությամբ հանրապետական մամուլում հանդես է եկել այլ հրապարակումներով⁷:

Հիմա հարց՝ եթե Բակունցը նախկինում կապված չլիներ դաշնակցության հետ, ինչո՞ւ հատկապես նա պետք է ղեկավարեր նախկին դաշնակցականների լուծարային համագումարը, պատասխանատու լիներ և՛ տպագրված գրքի, և՛ մամուլի օրգանի համար:

Ահա այստեղից էլ՝ նրան ուղեկցող ձայները, որոնք 1936–1937 թթ. վերածվեցին քաղաքական վայրահաչության:

Ձերբակալություն

1936 թ. հունիսի 2-ին Մոսկվայի «Նացիոնալ» հյուրանոցում Ակսել Բակունցը հանդիպում է ՀԿ(Բ)Կ Կենտկոմի առաջին քարտուղար Ադասի Նանջյանին: Քննարկում են Մարքսիզմ-լենինիզմի ինստիտուտի տնօրեն, լուսավորության ժողկոմ Ներսիկ Ստեփանյանի ձերբակալության հարցը, որը տեղի էր ունեցել մայիսի 21-ին: Խոստում են նաև «Զանգեզուր» ֆիլմի բեմադրի մասին: Ստեփանյանի ձերբակալությունից հետո Մոսկվայում Բակունցի վրա սահ-

⁵ Գ ա ս պ ա ր յ ա ն. 2009, 266:

⁶ Գ ա ս պ ա ր յ ա ն. 2009, 265–269:

⁷ Տե՛ս Գ ա ս պ ա ր յ ա ն. 2009, 302–326:

մանվում է Ներքին գործերի ժողովրդական կոմիսարիատի (ՆԳԺԿ) մարմինների հսկողություն:

Ընդամենը երկու օր անց՝ հունիս 4-ին, ՀԳՄ ժողովը Բակունցի բացակայությամբ նրան դատապարտում է որպես «ժողովրդի թշնամի»: Նրա դեմ խոսում են Վաղարշակ Նորենցը, Վահրամ Ալազանը, Հարություն Մկրտչյանը, Նաիրի Զարյանը, Նորայր Դաբաղյանը և ուրիշներ: Ժողովը որոշում է Բակունցին հեռացնել կուսակցությունից: Հուլիս 9-ին ՀԳՄ ժողովը վերստին դատապարտում է Բակունցին: Ելույթ են ունենում Նաիրի Զարյանը, Հմայակ Սիրաբ, Գուրգեն Հովնանը, Վաղարշակ Նորենցը, Հայկ Գյուլիքեխյանը, Վահրամ Ալազանը, Հարություն Մկրտչյանը, Նորայր Դաբաղյանը և ուրիշներ:

Դեպքերը զարգանում են փտանգավոր արագությամբ. հուլիս 9-ի երեկոյան Թիֆլիսում 1932-ից Անդրերկրկոմի առաջին քարտուղար Լավրենտի Բերիան սպանում է 1930 թ. մայիսից ՀԿ(Բ)Կ Կենտկոմի առաջին քարտուղար Աղասի Խանջյանին:

Հուլիս 14-ին ՀԳՄ ժողովն արդեն դատապարտում է Խանջյանին և նրա կողմից «հովանավորված» գրողներին, այդ թվում՝ Բակունցին: Բանասերկուններից պրոլետգրողների առաջնորդներից գրող, քննադատ Հարություն Մկրտչյանն այդ օրերին մամուլում մոլեգնող, այսպես կոչված, խանջյանականների մերկացումների մասին գրել է. «Մեզ հրավիրում են ՀԿԿ Կենտկոմ: Հավաքույթը ղեկավարում է Կենտկոմի պրոպագանդայի բաժնի վարիչ Աբել Օրդուխանյանը: Նա դիմում է մեզ. — Գրեցե՛ք, մերկացրե՛ք այդ նացիոնալիստներին: Եվ այն էլ հականե-հանվանե: Ընկեր Նաիրի Զարյան՝ Դ՛ու՛ք, ընկեր Հրաչյա Փոչար՝ Դ՛ու՛ք, ընկեր Սիրաբ՝ Դ՛ու՛ք, ընկեր Հովիկ Մելիքյան՝ Դ՛ու՛ք: <...> Անկեղծորեն պիտի ասեմ, որ նրանցից ոմանք՝ հենց նույն Նաիրի Զարյանն ու Հրաչյա Փոչարը, համոզված էին, որ Ակսել Բակունցը, իրոք, հակահեղափոխական էր»⁸:

1936 թ. հուլիսի 30-ին Բակունցն անապասելի վերադառնում է Մոսկվայից: Հայաստանում նրան սպասում էին ՆԳԺԿ գործակալները: Հավանաբար, հասել է Թիֆլիս, այնտեղից գնացել Դիլիջան, ուր հրաժեշտ է տվել ընտանիքին՝ հիվանդությունից՝ արյան վարակումից, ապաքինվող որդուն՝ Սևադային և կնոջը՝ Վարվառա Զրիվյանին:

Բակունցն արդեն քաղաքական չուրջկալի մեջ էր: Օգոստոս 3-ին նրան ներկայացրել են ՀԿ(Բ)Կ Կենտկոմի քարտուղար Ամատունուն: Նրանց զրույցը սղազրվել է: Օգոստոսի 5-ին, 7-ին երևանում, մինչև ձերբակալությունը, Բակունցը հարցաքննվել է ՆԳԺԿ մարմինների կողմից: Օգոստոսի 9-ին ՀԿ(Բ)Կ Կենտկոմի բյուրոն որոշում է Բակունցին կուսակցությունից հեռացնելու և «հակահեղափոխական ազգայնամոլական գործունեության համար ձերբակալելու մասին»⁹: Նույն օրը Բակունցը ձերբակալվում է: Նրա դեմ մեղադրանք է հարուցվում ըստ ՀԽՍՀ քրեական օրենսգրքի 67, 68 հոդվածների: Հետագայում ավելացվում են նոր հոդվածներ՝ 19–65, 78: Բակունցը մեղադրվում է «խմբակային հանցավոր գործունեության մեջ»¹⁰:

Ձերբակալության օրվանից մինչև 1937 թ. փետրվարի 4-ը ՆԳԺԿ աշխատակիցների կողմից Բակունցը բազմիցս ենթարկվել է դաժանադուլյն հար-

⁸ «Գրական թերթ» (Երևան), 17. III. 1989:

⁹ Գ ա ս պ ա ռ յ ա ն. 2009, 203:

¹⁰ Գ ա ս պ ա ռ յ ա ն. 2009, 203:

ցաքննությունների և աուդիտմանների, նրան ենթարկել են ֆիզիկական բռնությունների:

Ձերբակալության հաջորդ օրը երևանում է Նալբանդյան 80 հասցեով, խուզարկել են Բակունցի բնակարանը: Ըստ արձանագրության տարել են. վեց նամակ, երեք նոթատետր, մեկ ընդհանուր տետր, երկու ալբոմ, յոթ միավոր տարբեր գրառումներ, «Զանգեզուր» ֆիլմի բեմարքի երեք «վարիանտ» և այլ նյութեր:

Կնոջ «Ցուցմունքները»

Բանտում Բակունցին կինը՝ Վարվառա Զիվիջյանը, այցելել է երեք անգամ՝ 1936 թ., սեպտեմբեր-հոկտեմբեր-նոյեմբեր ամիսներին: Վերջին երկու այցելության ժամանակ նրա հետ է եղել նաև նրանց մինուճար որդին: Արդարացումից առաջ, ըստ ամենայնի համապատասխան մարմինների պահանջով, կինը հանդես է եկել «Ցուցմունքներով»։ «1936 թ. գարնանը Բակունցն այդ աշխատանքը [«Զանգեզուր» բեմարքը] հիմնականում ավարտել էր: Հայաստանի կոմկուսի Կենտկոմի նախկին քարտուղար Ա. Խանձյանը համառորեն պնդում էր, որ Բակունցը 2–3 ամսով մեկնի Մոսկվա՝ կինոսցենարը քննարկելու: Նրա համար շատ դժվար էր հիվանդ երեխային թողնել ծանր կացության մեջ, բայց, գիտակցելով հանձնարարության կարևորությունը, մեկնեց: Ես հիվանդ երեխային տեղափոխեցի Դիլիջան: Բակունցը երևան վերադարձավ օգոստոսի սկզբին և 1936 թ. օգոստոսի 9-ին ձերբակալվեց»¹¹:

Այնուհետև նա նկարագրում է հանդիպման պահերը. «Առաջին տեսակցության ժամանակ նա քիչ էր փոխվել: Նրա տրամադրությունը համեմատաբար առույգ էր, զգացվում էր, որ իր ձերբակալությունը համարում էր ինչ-որ թյուրիմացության հետևանք, որը շատ շուտ պիտի բացահայտվեր: Հոկտեմբերին ես նրան տվեցի հերթական սննդամթերքը և ստացա նրա օգտագործված սպիտակեղենը: Վերադառնալով տուն՝ մերկ մարմնին հազած նրա վերնաշապիկի վրա նկատեցի արյան հետքեր:

Հոկտեմբերի վերջին ինձ կանչեցին տեսակցության, ընդ որում՝ զգուշացնելով, որ ես պարտադիր ներկայանամ երեխայի հետ: Դժվար էր ինձ հետ վերցնել երեխային, բայց ես չհամարձակվեցի գնալ առանց նրա: Տեսակցությունը չափազանց ծանր էր: Բակունցը մեկ ամսվա ընթացքում այնքան էր փոխվել, որ ես դժվարությամբ ճանաչեցի այն մարդուն, ում ես գիտեի երկար տարիների ընթացքում:

Ամբողջ տեսակցության ժամանակ Բակունցը հեծկտում էր՝ կորցնելով ինքնատիրապետումը»¹²: Այս ընթացքում Բակունցը կնոջը թելադրում է իր կտակը՝ ինչպես դաստիարակել իրենց տղային, նաև՝ ասում, որ գրել է լիազորագիր, որով նրան է փոխանցում իր հեղինակային իրավունքները:

Այնուհետև «Ցուցմունքներ»-ում Զիվիջյանը շարունակում է. «Հաջորդ օրը ես մտա Ն ԳԺԿ, տարա նրա համար ընթերցելու գրքեր (առաջին երեք ամիսներին թույլատրեցին տանել գեղարվեստական գրականություն) և ետ ստացա այն գրքերը, որոնք նա արդեն կարդացել էր: Քննիչի օգնական Մալկույն ինձ

¹¹ «Հայոց լեզու և գրականություն», 2011, № 5, 39:

¹² «Հայոց լեզու և գրականություն», 2011, № 5, 39:

փոխանցեց լիազորագիր-կտակը՝ գրված Բակունցի ձեռքով և հաստատված ՆԳԺԿ-ի կողմից...»¹³:

Իրականությունը ճիշտ պատկերացնելու տեսակետից հույժ կարևոր է այս ցուցմունքի յուրաքանչյուր վկայություն, ուստի՝ դեռևս չարունակենք. «Այդ գրքերի մեջ էր Գի դը Մոպասանի պատմվածքների նոր ժողովածուն: Այդ գրքի ցանկում «Պարան» պատմվածքի տակ ես նկատեցի մատիտով դրված փոքր կետեր: Այդ ինձ զարմացրեց, որովհետև այդ գիրքը նոր էր (նրանցից, որ կալանքից առաջ բերել էր Մոսկվայից): Բացեցի պատմվածքը, որի լուսանցքներն ամբողջովին սեղմված-ընդգծված էին եղունգով: Պատմվածքի բովանդակությունը բացահայտեց նրա բարոյական ծանր կացությունը: Նոյեմբեր ամսին ինձ թույլատրեցին վերջին տեսակցությունը: Նա իրեն պահում էր հանդարտ:

«Հը, ընթերցե՞լ ես պատմվածքը, այն քեզ դո՞ւր է եկել»,– հարցրեց նա ինձ: «Ծանր է»,– պատասխանեցի ես նրան: Նա ասաց, որ հարցաքննությունն ավարտված է և սպասում է դատին: «Հավանական է, պետք է մեկնել, թեպետ դեռ կտեսնենք»,– ասաց նա:– Ամուր եղիր, հաշվիր, որ ավտովթար է եղել, և ես վթարի եմ ենթարկվել»: Դիմելով որդուն, ով ներկա էր նաև այդ տեսակցությանը, Բակունցն ասաց. «Դու չա՞տ կամաճես, եթե քո հորը Երևանի փողոցներով տանեն դատարան»:

– Ո՛չ, հայրի՛կ,– պատասխանեց տղան: <...>»:

1937 թ. սեպտեմբերի 17-ին ինձ կալանավորեցին, մեր բնակարանն ամբողջ ունեցվածքով արգելափակեցին, իմ երեխային հանձնեցին Բակունցի եղբորը, քաղցկեղով հիվանդ մորս թողեցին պատշգամբում, իսկ ինձ տարան բանտ»¹⁴:

Հարցաքննություններ

Ձերբակալված Բակունցը՝ ըստ Ալազանի, անընդհատ չափել է բանտախցի լայնքն ու երկայնքը և արտասանել Տերյանի տողերը.

Դու նահատակ պիտի լինես,
Մարգարե ու մարտիրոս,
Խարույկ ու խաչ պիտի ելնես,
Ո՛չ իբրև ստրուկ, այլ հերոս¹⁵:

Կարճ ժամանակ անց ձերբակալել են Բակունցի գործերի մեքենագրուհուն՝ Հռիփսիկ անունով, իբր եղել է Բակունցի սիրուհին, իմացել է նրա հակահեղափոխական գործունեության մասին և չի հայտնել:

Բակունցի հարցաքննություններից առանձնացնենք Չարենցին և «Նոյեմբեր»-ի ընդհանուր գործունեությանը վերաբերող հատվածները¹⁶:

Բակունցի 5. VIII. 1936 թ. հարցաքննության արձանագրությունից. «... եղել եմ մինչև 1927 թվականը «Նոյեմբեր» անունը կրող <...> գրողների խմբի ղեկավարներից մեկը: Մեր այդ խումբը, իր ստեղծագործության մեջ կատա-

¹³ «Հայոց լեզու և գրականություն», 2011, № 5, 39:

¹⁴ «Հայոց լեզու և գրականություն», 2011, № 5, 39–40:

¹⁵ Ալ ա գ ա ն. 1990, 65:

¹⁶ Տե՛ս Ալ ե ք ս ա ն դ ր. 1999, 11–114:

Ըստ արձանագրության՝ «Մեր խումբը կազմակերպչական և գործնական մեծ աշխատանք կատարեց հատկապես Չարենցի «Գիրք ճանապարհի» գրքի արգելման կապակցությամբ» և ամեն մի միջոցի պատրաստ էր դիմել լույսընծայումը գլուխ բերելու համար: Գրքի արգելումը Բերիայի հրահանգով էր²¹:

9. VIII. 1936 թ. հարցաքննության արձանագրությունից. «Երբ խոսք եղավ այն մասին, որ Չարենցի գիրքն արգելել է ՀամԿ(Բ) Անդրերկրկումը, Ստեփանյանը բառացիորեն ասաց հետևյալը. «Ա՛յ, եթե գտնվեր մի տղա, որը վերացներ Բերիային, ապա դա հայ ժողովրդի համար ավելի լավ կլիներ, քան ձեր գրքերը»²²:

Բակունցը Ստեփանյանի հետ ծանոթացել է 1933-ին Չարենցի միջոցով. ըստ արձանագրության՝ նա էլ դարձել է իրենց խմբի քաղաքական ղեկավարը և դրդել ահաբեկության: Իր և Չարենցի հարաբերությունների մասին Բակունցն ասում է, որ 1934-ից խզել է կապերը Չարենցի հետ և չի հանդիպել նրան²³:

2. IX. 1936-ի հարցաքննության արձանագրությունից. իմանալով, որ եղել է Ստալինի մոտ, այնուհետև՝ ասել Բակունցին. «Մեր նախնիները, պարզվում է, եղել են վրացիները: Միհրդատ Պոնտացին, պարզվում է, եղել է առաջին վրացին ...»²⁴:

4. XI. 1936-ի հարցաքննության արձանագրությունից. Չարենցն ասել է. «Ներկայումս տեղի է ունենում Հայաստանի ազգային վերածնունդ. մեր երկրում բանվոր դասակարգը երիտասարդ է, գյուղացիությունը՝ հետամնաց: Հետևաբար, միայն մտավորականությունը կարող է կատարել ազգային վերածնունդի կազմակերպչի դերը»²⁵: «Պնդում եմ, որ Չարենցը ոչ միայն եղել է մեր հակահեղափոխական կազմակերպության կենտրոնի անդամ, այլև նրա գաղափարական ղեկավարներից մեկն էր: <...>: Ճիշտ է և այն, որ իր բնավորության բերումով նա երբեմն գործում էր ինքնուրույնաբար»²⁶:

Վրաստանի գրողները նյութապես ավելի բարեկեցիկ են, քան հայ գրողները: Թիֆլիսում անդրկովկասյան ժողովուրդների արվեստի օլիմպիադայի կապակցությամբ վրացիները ծաղրել են հայ մշակույթը: Ուրարտուն վերագրում են իրենց, և եթե հայերը չեն ընդունում, որ առաջացել են վրացիներից, ուրեմն ազգայնամոլներ են:

Մեղադրանքներից մեկը՝ իբր Ձեմալ փաշային սպանող հերոս վրիժառու Արտաշես Գևորգյանին Բակունցը հավաքագրել էր՝ սպանելու Բերիային:

Խոստում են Ալազանի ցուցմունքները Բակունցի մասին: Ալազանին հարցաքննել են ձերբակալությունից 10 օր առաջ և նրա անունից արձանագրել. «Ես ունեի իմ միջանկյալ խումբը (Նորենց, Գ. Սարյան, Տարոնցի), բայց մի շարք հիմնական կողմերով պաշտպանում էի Չարենցի խմբին: Այս գրական պայքարի և Չարենցի «Գիրք ճանապարհի»-ի տպագրության հարցի կապակցությամբ ես մտերմացա Ն. Ստեփանյանի հետ: Իրոք, Ն. Ստեփանյանը գլխավոր

²¹ Ա. Լ. Բ. ս. ա. ն. դ. ր. 1999, 21:

²² Ա. Լ. Բ. ս. ա. ն. դ. ր. 1999, 25–26:

²³ Ա. Լ. Բ. ս. ա. ն. դ. ր. 1999, 25–27:

²⁴ Ա. Լ. Բ. ս. ա. ն. դ. ր. 1999, 48:

²⁵ Ա. Լ. Բ. ս. ա. ն. դ. ր. 1999, 65:

²⁶ Ա. Լ. Բ. ս. ա. ն. դ. ր. 1999, 66:

րում էր նացիոնալիստներն տրամադրված գրողների խումբը (Չարենց, Բակունց և ուրիշներ), նրանց կանչում էր իր տուն և պայքար կազմակերպում կուսակցության գծի դեմ: Ես ևս մեկ անգամ մասնակցել եմ այդպիսի խորհրդակցության: Դա այն ժամանակ էր, երբ Չարենցի գրքի արգելման պատճառով Անդրերկրկոմի կուլտպրոպ բաժնի վարիչ Բեդիայի գլխավորությամբ սպասվում էր հանձնաժողովի գալուստը: Ինձ հրավիրել էր Չարենցը: <...>: Ստեփանյանը գայրացած էր՝ թե ինչո՞ւ վրացիները պիտի որոշեն հայ բանաստեղծի գրքի տպագրության հարցը: Որոշեցինք դիմել ՀԿ(Բ)Կ Կենտկոմ, որպեսզի պոեզիայի զեկուցումը համագումարում հանձնարարվի Չարենցին: Իր գրքի արգելման կապակցությամբ գայրացած էր նաև Չարենցը և ասում էր. «Սա ի՞նչ բան է՝ Ա. Խանջյանն ու Ս. Տեր-Գաբրիելյանը թույլատրում են իմ գրքի տպագրությունը, իսկ Արիսյանն ու Բեդիան՝ արգելում»:

Չարենցի մոտ երբեմն տեսել եմ Ստեփանյանին: Չարենցը, Բակունցը և ես ղեկավարում էինք գրողների համագումարի նախապատրաստական աշխատանքը: Խանջյանը հովանավորում էր Չարենց-Բակունց խմբի գործունեությունը: <...>: Հարելով Չարենց-Բակունց նացիոնալիստական խմբին՝ ես թույլ եմ տվել քաղաքական կոպիտ սխալ»²⁷:

Ալազանի հաջորդ հարցաքննություններից. «Այո՛, ես ընդունում եմ, որ 1933-ի վերջերից հարել եմ Չարենցի և Բակունցի գլխավորությամբ գործող գրողների հակահեղափոխական, նացիոնալիստական խմբին և հակահեղափոխական, նացիոնալիստական դիրքերից պայքար եմ մղել կուսակցության գլխավոր գծի դեմ՝ դրանով իսկ մնալով կուսակցության գլխավոր թշնամի և երկերեսանի: 1932 թ. Չարենցն ինձ անվանել է «Չեկայի ագենտ»: Բայց քանի որ ես դեմ էի նրա գրքի արգելմանը, այդ հիմքի վրա բարեկամացանք»:

<...>: Մեր խմբի անդամներից Չարենցն, անկասկած, ձգտում ուներ դառնալու համահայկական դեմք, իսկ տվյալ պարագայում հայ հակահեղափոխական նացիոնալիզմը միավորող կենտրոնական հանգույց: Նա իր շուրջն էր համախմբել կշիռ և հեղինակություն ունեցող կադրային մտավորականության որոշակի շրջանակներ, որպեսզի նրանց միջոցով ժողովրդին հասցնի իր ձայնը: <...>: Չարենցը և Բակունցը ծավալում էին իրենց հակահեղափոխական գաղափարների որոշակի քարոզչություն՝ ուղղված Անդրդաշնության դեմ: <...>: Ես ցանկանում եմ ընդգծել, որ Չարենցն ու Բակունցը, հատկապես Չարենցը, առանձնահատուկ ջանադրությամբ էին մտավորականության մեջ մղում հակահեղափոխական, նացիոնալիստական քարոզչություն: <...>: Երբ Չարենցին հեռացրին գրողների միությունից, Մ. Սարյանն ինձ հայտնեց իր դժգոհությունը և ասաց, որ այդ հարցով կբողոքի Կենտկոմ: <...>: Խանջյանի ինքնաապանությունից 15 օր առաջ նրա մոտ էի: Ասաց, որ Չարենցն ու Բակունցը կապ ունեին արդեն ձերբակալված Ստեփանյանի հետ: Նրանց էլ պիտի ձերբակալեին, բայց Խանջյանը թույլ չի տվել, ինչպես ինքն էր ասում հայ գրականությունը կորբանար»²⁸:

Ալազանի հարցաքննությանը Ներսիկ Ստեփանյանի հարցաքննությունից կցված է քաղվածք. «Այո՛, խոստովանում եմ, որ հայկական ռազմաշունչ հակահեղափոխական նացիոնալիզմի ղեկավարն եմ: Ես հովանավորում էի Չա-

²⁷ Գ ա ս պ ա Ր յ ա ն. 1994, 157–169:

²⁸ Գ ա ս պ ա Ր յ ա ն. 2009, 424:

րենցի, Բակունցի, Ալազանի գլխավորությամբ գործող գրողների նացիոնալիստական խմբի գործունեությունը»²⁹:

Բերիայի կամակատար, ձերբակալված, հետո գնդակահարված Արիսյանի հարցաքննությունից. «Խանձյանն ու Ակոպովը [ՀԿ(Բ)Կ ԿԿ-ի քարտուղար–Դ. Գ.] հաճախ ինձ նախատում էին, որ ես անարդար եմ վարվում հայ գրողներ Չարենցի, Բակունցի, Թովթովենցի, Ալազանի հանդեպ ...»³⁰:

1936 թ. օգոստոսի 19–24-ը Մոսկվայում տեղի է ունենում «Տրոցկիստական-գինովակական կենտրոն»-ի դատավարությունը: ԽՍՀՄ պետական մեղադրող, գլխավոր դատախազ Ա. Յա. Վիշինսկին ճառն ավարտում է արյունոտ կոչով. «Գնդակահարել կատաղած շներին, բոլորին մինչև վերջին մարդը»³¹: Դատավճիռը կայացրել է ԽՍՀՄ Գերագույն դատարանի գինովորական կոլեգիան: Մոսկովյան այս ալիքը հասնում է Հայաստան:

Գրական քննադատություն

Ինչ հարցաքննություններ էին բանտի զննաններում, նույնը նաև թերթերի էջերը սևացնող հոդվածներն էին: Ստորև Բակունցի ու նաև նրա մասնակցությամբ իմաստավորվող «Նոյեմբեր» խմբակցության կապակցությամբ ներկայացնենք ամենաբնորոշները:

«Գրական թերթ»-ի «Միշտ բարձր պրոլետարական ինտերնացիոնալիզմի դրոշմը» խմբագրականից. Խանձյանը հովանավորել է նրանց, ովքեր «...մեր գրականության մեջ հանդես են գալիս որպես նացիոնալիզմի տիպիկ արտահայտիչներ (Ակսել Բակունց, Դ. Սիմոնյան, Գ. Վանանդեցի, Թովթովենց, Ալազան, Նորենց, Գ. Մահարի և ուրիշներ): <...>: Ավելին, Ա. Բակունցը՝ այդ քողարկված դաշնակը մեր կուսակցության շարքերում, Խանձյանի կողմից հայտարարվեց որպես մեր գրականության վարպետներից մեկը: [Խանձյանի հովանավորությամբ] ... հրապարակ են չարտվել մի շարք բացարձակապես նացիոնալիստական աշխատություններ: Այդ աշխատություններից տիպական են հակահեղափոխական տրոցկիստ-նացիոնալիստ Վ. Վահանյանի, նացիոնալիստ-տրոցկիստ Ա. Բակունցի աշխատությունները, Գ. Վանանդեցու հոդվածները և Ա. Աբովյանի մասին ...»³²: Իբրև Աբովյանը միջոց է բացահայտելու իրենց նացիոնալիզմը, իբրև Վաղարշակ Տեր-Վահանյանի և Ներսիկ Ստեփանյանի ղեկավարությամբ «Փաշիգամի, սպիտակ գվարդիականության հետ միաձուլված», օրը ցերեկով Խանձյանի իմացությամբ ահաբեկություն են կազմակերպել «կուսակցության լավագույն գավակների դեմ»: Թովթովենցի «Կյանքը հին հռոմեական ճանապարհի վրա» վիպակը շողախաված է «գոռոգիական նացիոնալիզմով, թրքատյացությամբ», Բակունցի «Ծիրանի փողը» «քողարկված կերպով անցկացնում է ֆաշիստական դաշնակցության քարոզները»³³: Բակունցի համախոհներ և նացիոնալիզմի քարոզիչներ են համարվում Ռաֆայել Ալթայանը, Սուրեն Հարությունյանը, Խորեն Սարգսյանը:

«Գրական թերթ»-ի նույն համարում տպագրվում է Ն. Ջարյանի «Նացիոնալիստը խորհրդային գրողի դիմակով» ամոթալի հոդվածն ընդդեմ ձերբա-

²⁹ Գ ա ս ա լ ա ռ յ ա ն. 2009, 262:

³⁰ Գ ա ս ա լ ա ռ յ ա ն. 2009, 262:

³¹ «Գրական թերթ», 25. VIII. 1936:

³² «Գրական թերթ», 25. VIII. 1936:

³³ «Գրական թերթ», 25. VIII. 1936:

կալված Բակունցի: Այն ուղղված էր ոչ միայն Բակունցի, այլև Խանջյանի և նրա «Հովանավորների» դեմ. «Եվ Բակունցը սողաց գրական ասպարեզ: Ընթերցողին հայտնի է նրա «գրական» գոյությունը սկզբնական շրջանը <...>: Բակունցն արտահայտում է այն միտքը, թե հայ գյուղացին, բնությանն ու վայրի գազաններին ձուլված, տարերային մի ֆենոմեն է և իր կենցաղով և հոգեբանությամբ չի տարբերվում արջից: Ահարոնյանական ոճով գրված այդ լղարիկ հատվածներում չկա մարդկային ոչ մի կենդանի կերպարանք, իրական կենցաղի ամբողջական ոչ մի նշույլ: Բայց գտնվեցին տկարամիտ լիբերալներ, որոնք <...> խորհրդային գրողի համբավ ստեղծեցին Բակունցի համար: <...>: Բակունցն իր գրական ողջ գործունեության ընթացքում օձային հետևողականությամբ թույն է արտադրել իր բոլոր գրվածքներում: <...>: Կոլեկտիվ տնտեսությունը նա չի տեսնում, չի նկատում տրակտորի հետքը ճանապարհի վրա, չի լսում Լենինին և Ստալինին նվիրված ժողովրդական երգերը համայնական դաշտերում աշխատող կոլտնտեսականների շուրթերից»³⁴:

Ն. Զարյանը ծաղրում է Բակունցի լեզուն՝ «Կեղծ դիալոգ, չինձու գոեհիկ գավառաբարբառով», ինչի համար նացիոնալիստ քննադատները նրան հռչակել են վարպետ, մինչդեռ Բակունցին բնորոշ են «քստմանի շովինիզմը», «հայրենիքի սահմանները ընդարձակելու և հակաթուրքական տրամադրությունները»: «Բակունցը զրպարտում է հայ աշխատավոր գյուղացիներին՝ իր դաշնակցական զոդոգիական թրքատեցությունը վերագրելով նրանց: Բակունցը ոչ միայն մազաչափ չի բարձրանում Բաֆֆու ռասայական թրքատեցությունից, այլև մի աստիճան ավելի խորն է թաղվում անասնական շովինիզմի թունավոր ճահիճը: Մի՞թե պարզ չէ, որ Բակունցի բերանով խոսում է դաշնակ խմբապետը՝ <...> բացարձակ կոչ անելով դեպի Մարութա սարը»: Այդպես, որովհետև նրա սողերը հիշեցնում են հին երգը. «Առանց ահի, առանց վախի, // Քաջերի բուն Սասնա սար»³⁵:

Նույն հոդվածում Ն. Զարյանը շարունակում է. «Ամբողջ այս վիպակը [«Որդի որոտման»] տրոցկիստական հակահեղափոխական քստմանի մի պամֆլետ է՝ ուղղված գյուղի սոցիալիստական վերակառուցման մեր ստալինյան քաղաքականության դեմ, և Բակունցը դիտմամբ կիսատ է թողել այն, որպեսզի մարդկանց խաբի և խուսափի պատասխանատվությունից»: Դաշնակցությունից «Խնչպիսի թունավոր բազածով է եկել մեր կուսակցության շարքերը Ա. Բակունցը»³⁶:

Հերթը հասնում է մյուսներին. Ալազանը՝ «գրական խալտուրայի վարպետ», Նորենցը՝ «Խանջյանի թաշկինակ», Տեր-Սիմոնյանը՝ «... մինչև իր ոսկորների ծուծը փտած, հանրածանոթ ստախոս»³⁷:

Ն. Զարյանը հասցնում է գրական այս եղեռնի վերջին հարվածը. «Իսկ մեր խորհրդային գրականությունը մեր բոլշևիկյան կենտրոնի աջակցությամբ հսկայի քայլերով առաջ կգնա՝ ազատագրվելով Ա. Բակունցի և բոլոր երանգի նացիոնալիստների ու տրոցկիստների թունավոր միջամտությունից»³⁸:

³⁴ «Գրական թերթ», 25. VIII. 1936:

³⁵ «Գրական թերթ», 25. VIII. 1936:

³⁶ «Գրական թերթ», 25. VIII. 1936:

³⁷ «Գրական թերթ», 25. VIII. 1936:

³⁸ «Գրական թերթ», 25. VIII. 1936:

1936 թ. սեպտեմբերի 14-ին պատմաբան Հակոբ Զորյանի ստորագրությամբ գրություն է հասցեագրվում Կենտկոմ. «Քանի որ այժմ Ակսել Բակունցի տրոցկիստական-նացիոնալիստական հակահեղափոխական գործունեության մասին քննություն է կատարվում, անհրաժեշտ եմ գտնում Ձեր ուշադրությունը հանձնել մի բանով՝ 1931–1932 թթ. տեղի ունեցած, որտեղ ցայտուն կերպով դրսևորվել են Ակսել Բակունցի նացիոնալիստական հայացքները և նրա գտած հովանավորումը Կենտկոմի նախկին քարտուղար Ա. Խանջյանի կողմից»³⁹:

Հակոբ Զորյանի ակնարկած հիշյալ բանավեճն ընթացել է «Նոր ուղի» ամսագրում (1931, թիվ 4, 5), ուր Զորյանը «Հայ բուրժուական պատմագրության կոնկրետ արտահայտությունները» վերնագրով գրախոսել է Հակոբ Մանանդյանի⁴⁰ «Հայաստանի առևտրի և քաղաքների մասին» (1930, ռուսերեն) գիրքը, որին ի պատասխան Անդր. Ստեփանյան ստորագրությամբ, որը Բակունցի ծածկանուններից է և հայտնի էր Զորյանին, տպագրվել է «Մի գրախոսության առթիվ» գրությունը⁴¹: Դրանում հաշվի են առնված Մանանդյանի նկատառումները, քանի որ վերջինս հրաժարվել է գրել պատասխան հոդված: Մարքսիստ պատմաբանների ընկերությունն այդ առթիվ որոշում է կայացնում Զորյանի օգտին⁴²:

1936 թ. հոկտեմբերի 6-ին բանտարկված Բակունցը «Դիմում» է հասցեագրում ՀԿ(ք) Կենտկոմի առաջին քարտուղար Ամատունուն և ՀԽՍՀ-ում Անդրկովկասի արտակարգ հանձնաժողովը պետքադվարչության ներքին գործերի ժողովրդական կոմիսար Խաչիկ Մուղդուսուն. ներկայացնում է նաև իր ու Չարենցի գրական-ստեղծագործական, մարդկային ու առօրյա հարաբերությունները:

Հիշեցնում է 1933-ից իր և Չարենցի աստիճանաբար խզված կապը, որը հնարավոր է էր վերականգնել անգամ իրենց վերստին մերձեցնելու փորձերից հետո, մանավանդ որ Չարենցը քննադատել էր նրա հայ ազգային մտավորական տիպեր մերկացնող «Հայկական մանրէ» անտիպ վիպակը, և որ ինքը մերժում էր նաև Չարենցի գրականության լեզվի գործադրման սկզբունքների քաղաքականությունը. «... գրական լեզվում Չարենցն ինքը ազգայնամոլության հետևորդ է»⁴³:

Դեմ է եղել նաև ՀԿ(ք) Կենտկոմի ագիտացիայի և պրոպագանդայի բաժնի վարիչ Լևոն Արիսյանի հանդեպ Չարենցի կտրուկ վերաբերմունքին: Տարածայնությունները խորացել են ԽՍՀՄ գրողների հիմնադիր համագումարից հետո, քանի որ Չարենցը ստեղծագործական քայլ հարեց «խորհրդային գրականության օգտին»: Գրողների միությունից հեռանալու Չարենցի դիմումից հետո մեկընդմիջտ խզել է կապերը: «Նրա [Չարենցի] հետ ես, իհարկե, ամեն ինչ մեկընդմիջտ [վերջ եմ տվել], և դա՛ ղեռ վաղուց, տարիուկես սրանից առաջ: Ո՛չ նրա սպառնազին նամակը՝ գրված նրա մի քանի հակախորհրդային արարքների դեմ իմ ունեցած ելույթի հաջորդ օրը, ո՛չ մեզ վերստին մերձեց-

³⁹ Հայաստանի ազգային արխիվ, ֆ. 1, գ. 1, ց. 16, թ. 62:

⁴⁰ «Նոր ուղի», 1931, № 4, 131–144:

⁴¹ «Նոր ուղի», 1931, № 5, 151–159:

⁴² «Նոր ուղի», 1932, № 1, 153:

⁴³ Ա. Լ. Ե. Բ. Բ. 1999, 48–55:

նելու Վանանդեցու և այլոց փորձերը, ոչինչ չէին կարող վերականգնել ոչ թե միանգամից, այլ աստիճանաբար խզված կապը՝ սկսած 1933 թվականից (Չարենցի կողմից իմ ձեռագիր երգիծական ստեղծագործության քննադատությունից հետո <...>): Հայտնի է նաև, որ շուտով մեր խմբի գրողների գրական ստեղծագործությունների մեջ ազգայնամոլության դրսևորման վերաբերյալ իմ քննադատական ելույթից հետո, այդ խմբի անդամներ Չարենցը և Արմենը գրավոր դիմումով հրաժարվեցին իրենց սխալներն ընդունելուց և շարունակեցին պաշտպանել Արմենի խմբակային հոդվածը ու հին խմբակի ամբողջ գրական ծրագիրը: Կասեմ միայն, որ ընկ. Լ. Արիսյանի հոդվածում և գրողների համագումարում նրա ճառի մեջ՝ իմ ելույթը՝ որպես օգտակար ինքնաքննադատության օրինակ, արժանացել է դրական գնահատականի: Մոսկվայի գրողների համագումարում ես Չարենցի հետ չէի. ես ելույթ ունեցա ըստ Գորկու զեկուցման, նա՝ ըստ Բուխարինի, և «Պրավդա»-ում տպագրված մեր ելույթները հին խմբակի համար ընդհանուր կամ բնորոշ ոչ մի հետք չէին բուխանդակում, թեև Նաիրի Զարյանը ևս, ինչպես պնդում են հայոց պատմիրական մնացած անդամները, նույնիսկ մոսկովյան համագումարում փորձում էր շարունակել խմբակային պայքարը՝ վկայակոչելով Խանժյանի ճառը: Հայտնի է, որ դրա համար «Պրավդա»-ն նրա ելույթի հաղորդագրությունը չտպագրեց, իսկ համագումարի նախագահությունն ընդհատեց նրա ելույթը: Իմ առաջին հանդիպումը Չարենցի հետ տեղի ունեցավ 1934 թ. վերջին, արդեն իսկ պարզ էր, որ մենք երկար չէինք կարող միասին լինել:

Քանի որ այդ ձմեռ ես աշխատում էի Էջմիածնում և մինչև 1935 թվականի փետրվարը հազվադեպ էի քաղաք գալիս, այսինքն՝ մինչև գրողների միությունից նրա հեռանալու դիմումը, ինչն էլ առիթ ծառայեց Չարենցի դեմ իմ ելույթին, որից հետո մեկընդմիջ խզեցի [կապերս] նրա հետ»:

Բակունցն այստեղ իր մասին ասում է. «Ես հրատարակել եմ երկու գիրք՝ «Եղբայրության ընկուզենիները» և «Լիբեր Արմենիներ»-ը» և ավելացնում՝ վերջինը թարգմանված է ռուսերեն, դրա մասին դրական են արտահայտվել ԽՍՀՄ ԳՄ քարտուղարներ Վլադիմիր Ստավսկին, Միխայիլ Կրիմովիչը, գրողներ Վլադիմիր Կատաևը, Մարիետա Շահինյանը, «Творчество народов СССР» ավանախի խմբագրությունը⁴⁴:

Մամուլում շարունակվում են հակաժանքները: Տպագրվում է Վահան Թեր-գիրբաչյանի «Հակահեղափոխական նացիոնալիստների գրական հնարքները» գրադարձագիրը՝ ընդդեմ Բակունցի, Թոթովենցի, ուլբեր, իբր, ճնշել են Արագի-ին, Ստեփան Զորյանին, Նաիրի Զարյանին. ««Ազգային հատկանիշների խտացման» ռեակցիոն թեորիայի պաշտպանները փաստորեն ժխտում էին մեր գրականության և արվեստի սոցիալիստական էությունը, նրա ինտերնացիոնալ հեղափոխական բովանդակությունը»⁴⁵:

Չարենցի «Ա. Բ.-ին» բանաստեղծությունը

Ամատունու, Մուղղուսու և հայ «գրողների» կողմից Բակունցին հոգեպես և ֆիզիկապես քրքրող այս օրերին՝ 1936 թ. հոկտեմբերի 14-ին, Չարենցը

⁴⁴ Գ ա ս պ ր յ ա ն. 2009, էջ 241:

⁴⁵ «Գրական թերթ», 12. X. 1936:

գրում է «Ա. Բ.-ին» բանաստեղծությունը՝ որպես եղբայրական զորակցություն հարցաքննություններից ու կոտանքներից բանտում հեծող գրական ընկերությանը: Նույն գիշերը Չարենցը գրել է բանաստեղծության այլ տարբերակներ, որոնց մեջ «ներում» է նրա «հանցանքը». «Ես ներում եմ ահա իմ անաղարտ // Մտերմության, սիրո առևանգումն անգամ ...»⁴⁶: «Ես ներում եմ ահա խեղճությունը քո իբրև սովորական // Դժբախտություն, երբ քո գլխին հանկարծ // Ընկնում է քար վերից ...»⁴⁷: Ժամանակն ու միջավայրը քաղաքական թունավորումներով սառեցրել էին նրանց հարաբերությունները: Մի թանկ հարաբերության ավարտի գիտակցությունը Չարենցին մղում է եղբայրորեն ձեռք մեկնելու նրան և ներբողելու

... ահա կրկին անելծ
Իմ չուրթերով, ինչպես օրեր առաջ. —
Երբ դեռ դու այն էիր մի անարատ,
Եվ ես ընկերն էի քո բանաստեղծ⁴⁸:

Ներքին խռովքն այստեղ մնացել է միայն մեկ բառի մեջ՝ «երբ դեռ»: Այս հարաբերությունների վրա լույս են սփռում Բակունցի հարցաքննությունների արձանագրություններն ու բանտից գրած դիմումները՝ հատկապես հոկտեմբերի 6-ին Ամատունուն և Մուղղուսուն հասցեագրած ահավոր ողբերգական գրությունը:

Բակունցի ճակատագիրն արդեն որոշված էր. Չարենցը նրան գեղարվեստական տեսք տվեց, բայց հարցաքննություններին հաջորդող դատավճիռներն այլ բան էին ասում:

Ինքնարդարացման հուսահատ փորձեր և ՊԱԶ = պատժի առավելագույն չափ = գնդակահարություն

ՀԿ(Բ)Կ Կենտկոմի առաջին քարտուղար Ամատունին 1936 թ. հոկտեմբերի 2-ին գեկուցում է Նրևանի կուսակցական կազմակերպության ակտիվի նիստում, հրապարակում ձերբակալված Բակունցի «ցուցմունքը» և խիստ քննադատության ենթարկում նրան: Իսկ Բակունցը 1936 թ. հոկտեմբերի 10-ին բանտից հերթական «Դիմում» է հղում հանրապետության ղեկավարությանը՝ ապացուցելու իր անմեղությունը. «Ես Խորհրդային Հայաստանի լավագույն արձակագիրն էի («Պրավդա», 1934), հայ խորհրդային գրականության կառքին լծված քեղածի, թողեք, որ ես մնամ Խորհրդային Հայաստանի դուռն հավաստարիմ շունը»⁴⁹:

1937 թ. ապրիլի 16-ի ՀԳՄ ընդլայնված նիստում գեկուցում է գրողների միության ղեկավարի դերում հայտնված Գևորգ Աբովը: Մեղադրական խուսք է ասում մոսկովյան գրաքննադատ Վալերի Կիրպոտինը: Ելույթ ունեցողների մեջ են Հրաչյա Քոչարը, Սուրեն Վահունին, Արտաշես Ոսկերչյանը, Հմայակ Սիրաբը, Մկրտիչ Կորյունը, Սողոմոն Սողոմոնյանը, Տիգրան Հախումյանը,

⁴⁶ Չ ա ռ ե ն ց. 1983, 570:

⁴⁷ Չ ա ռ ե ն ց. 2007, 104:

⁴⁸ Չ ա ռ ե ն ց. 1983, 165:

⁴⁹ Գ ա ս պ ա ռ յ ա ն. 1999, 55:

Միմոն Հակոբյանը և ուրիշներ: Ընդհանուր այս սե հորձանքին իրենց ձայնն են միացնում նաև Ավետիք Իսահակյանն ու Դերենիկ Դեմիրճյանը: Աբովը Չարենցին հռչակում է նացիոնալիստ, հակահեղափոխական, հանցագործ, մինչդեռ կուսակցությունը «նրա նկատմամբ հանդուրժողական վերաբերմունք է ցուցաբերում»։ Ըստ էության, ասում է, թե ինչո՞ւ Չարենցը դեռևս ձերբակալված չէ:

Աբովն ու վերը նշված անձինք Չարենցին հռչակում են իր իսկ նվիրական գաղափարների թշնամի, և նա չի կարողանում ապացուցել լույսի պես պարզ այդ ճշմարտությունը: Մարտիրոս Սարյանը հիշում է. «Մի քանի վաստակավոր համբակներ և խառը այդ ժամանակներում ջրի երես թռած նորելուկ կարիերիստներ ատելով ատում էին Չարենցին: Ժողովների, գրական-գեղարվեստական հավաքույթների, գրավոր ու բանավոր վեճերի ժամանակ բամբասանքի կարգով, բոլոր միջոցներով պախարակում, սեպնում էին նրան: Քաղաքական մեղադրանքներ էին բարդում գլխին: Ոչ նախանձն էր պակաս, ոչ էլ ծախուռ ճանապարհով առաջ գնալու տենդը: Հիշում եմ, Հայաստանի գրողների համագումարում, դեմքը դարձնելով Մոսկվայի ներկայացուցիչների խմբին (կարծեմ գրականագետ Կիրպուտինն էր), Չարենցը ամբիոնից բողոքում էր իր վիճակից: Ռուսերեն, ծայրահեղորեն բորբոքված, գոռաց. «Ինձ խեղդո՞ւմ են»... Այս ահավոր ճիչը մինչ այժմ էլ հնչում է ականջումս...»⁵⁰: Ահա այսպես՝ կատաղած, չարացած գրական ոհմակը վրեժխնդիր է լինում անպաշտպան հանճարից:

Եվ հուսահատության մատնված 1934 թ. մարտի 1-ի գրառումներում խոսում է ինքն իր հետ. «Քանզի չկա տանջանք ավելի մեծ և պատիժ ավելի սև, քան դատել մարդուն նրա սրբազան գաղափարի, նրա ողջ կյանքի միակ գործին դավաճան լինելու համար»⁵¹:

«Նոյեմբեր» խմբի ամօթալի մերկացումներով է հանդես գալիս անգամ Մկրտիչ Արմենը և Բակունցին բնորոշում որպես «կուստոմսավոր դաշնակցական»⁵², Չարենցի, Բակունցի կողքին հիշատակում Ներսիկ Ստեփանյանին, տրոցկիզմի մեջ մեղադրված Վաղարշակ Տեր-Վահանյանին, նրանց համարում «սրիկաների ոհմակ», ավելացնում է նաև այլ անուններ, որպես չիրականացված չարիք հայտնում, որ անգամ Ալազանը և ոմանք ցանկացել են Չարենցի թեկնածությունն առաջադրել Հայաստանի գրողների միության նախագահի պաշտոնում, նույնիսկ Չարենցին տեղյակ են պահել կուսֆրակցիայի նիստերի բովանդակությանը ...

Բանտում Բակունցն այլևս չպետք է տեսներ արևի լույս և պիտի սպասեր մահվան, Չարենցը Կիրպուտինի կողմից պետք է հռչակվեր ժողովրդի թշնամի. «...նա, ով կոնֆլիկտի մեջ է մտնում ժողովրդի հետ, ով անցնում է նրա թշնամիների ճամբարը, կանգնում է վտանգավոր ուղու վրա: Եվ ահա, այդպիսի վտանգավոր ուղու վրա է այժմ գտնվում Չարենցը, ինչի մասին պետք է ասել լիաձայն»⁵³:

⁵⁰ Չարենցի հետ: Հուլիս. 1997, 409:

⁵¹ Չ ա ր ե ն ց. 2017, 261:

⁵² Չ ա ր ե ն ց. 2017, 261:

⁵³ ՀՀ գրականության և արվեստի թանգարան, Գրողների միության ֆոնդ (այսուհետ՝ ԳԱԹ, ԳՄՖ), № 16–17:

Հրաչյա Քոչարը հայտարարում է. Չարենցի մեջ «... մենք տեսնում ենք ռեակցիոն լեզու, ռեակցիոն ոճ: <...>: Իր գրական և հասարակական գործունեությամբ վերջին տարիների ընթացքում Չարենցը մի քար էր ընկած խորհրդային պոեզիայի ճանապարհին: Այսօր, ընկերներ, երբ մենք խոսում ենք սոցիալիստական ռեալիզմի մասին, անշուշտ, պետք է Չարենցի այս գրականությունը ջախջախվի և դեն չալրտվի, որպեսզի իր ազդեցությունը չունենա երիտասարդ գրողների վրա»⁵⁴:

Նախորդ օրվա՝ 1937 թ. ապրիլի 16-ի ջարդարարությունից հետո այս խմբակային մարդասպանությունը նոր թափ է առնում ապրիլի 17–21-ին տեղի ունեցած հայ գրողների ընդհանուր ժողովում⁵⁵:

1937 թ. մայիսի 26-ից հունիսի 2-ը գումարվում է ՀԿ(Բ) X համագումարը: ՀԿ(Բ) Կենտկոմի առաջին քարտուղար Ամատունին իր ճառում մահվան դատալծիւ է կայացնում Չարենցի, Բակունցի և նրանց հարողների համար: Առանձին բաժնով ներկայացված են «Գրականության և արվեստի հարցերը»: Ամատունին խիստ քննադատում է Չարենցին, Բակունցին, նրանց համախոհ արդեն իսկ ձերբակալված գրողներին և «Նոյեմբեր» միության գործունեությունը: Ըստ նրա՝ Խանջյանի հանձնարարությամբ «դաշնակ» Բակունցն առաջարկել է ֆիլմ նկարահանել և ցուցադրել «դաշնակ ավանտյուրիստների հարձակումը Օտտոմանյան բանկի վրա, պահանջում էին կինոնկար պատրաստել հակահեղափոխական դաշնակ-խմբապետ Անդրանիկի մասին»⁵⁶:

Հայաստանի պրոլետարական գրողների ասոցիացիան ներկայացնում է որպես Ռուսաստանի պրոլետարական գրողների ասոցիացիայի մասնաճյուղ, իսկ «Նոյեմբեր»-ը՝ սպեցիֆիկյան ուղղվածության ազգայնական կազմակերպություն:

««Նոյեմբեր» խմբակը, որ առաջ էր եկել 1925 թ. Հայաստանի Կ(Բ) Կենտկոմի նացիոնալ-ուկլոնիստական-սպեցիֆիկյան ղեկավարության աջակցությամբ [ակնարկում է Ա. Մյասնիկյանին և Ա. Հովհաննիսյանին], սնվում էր սպեցիֆիկների հակահեղափոխական թեորիայով, որը ժխտում էր Հայաստանում պրոլետարական գրականություն ստեղծելու անհրաժեշտությունն ու հնարավորությունը, հայկական խորհրդային գրականությունը հակադրում էր ռուսական խորհրդային գրականությանը: Հենց այդ խմբակի ձայնավողն էր հանդիսանում գրող Մ. Արմենը, որն ապրիլի 23-ի որոշումից հետո հանդես եկավ «ազգային հատկանիշների խտացման» վերաբերյալ «տեսությամբ», որը, ըստ էության, մարտնչող նացիոնալիզմի պրոպագանդ էր: Մեր նվաճումների ազդեցության տակ իր դիրքերի հակահեղափոխականությունը խոստովանեց գրող Նդիշե Չարենցը: Հայաստանի Կ(Բ) Կենտկոմի անունով ուղղած իր նամակում նա հայտարարում է. «Ես նույնիսկ չեմ կասկածում, որ, իրոք, իմ սխալներն ունեն նացիոնալիստական, հետեաբար և (սոսկում եմ ասել) հակահեղափոխական, ուրեմն և հակախորհրդային էություն»: Այս խոստովաները և իր սխալների ու վարմունքի քննադատությունը Չարենցին պարտավորեցնում են մինչև վերջը գիտակցել իր հանցանքը խորհրդային գրականության հանդեպ և գործնականում նոր ստեղծագործական պրոդուկցիայով ապացուցել, որ նա իսկապես դառնում է լիարժեք խորհրդային գրող: Ժամանակն է,

⁵⁴ ԳԱԹ, ԳՄՅ, № 16–17:

⁵⁵ Տե՛ս «Գրական թերթ», 23. IV., 01. V., 12. VI. 1937:

⁵⁶ «Գրական թերթ», 12. VI. 1937:

վերջապես, որ Չարենցը լրիվ հաշիվ տա իրեն իր ամբողջ ուղու մասին և դադարեցնի թե իր և թե գրականության հանդեպ երկերեսանիությունն անելը:⁵⁷ Նա պետք է հասկանա, որ ամենից առաջ հարկավոր է անկեղծություն»⁵⁸:

Չարենցն արյան հրդեհների այս խելագար շուրջպարի մեջ էր:

Ամատունին գնահատող խոսք է ասում Իսահակյանի, Վշտունու, Ջարյանի, Սիրասի, Արագիի մասին, հանդուրժում ուղեկիցներ Դեմիրճյանին, Ջորյանին, Մանվելյանին, ովքեր «վերակառուցվել» են ... Առանձին դաժանությամբ է խոսում, իբր, Խանժյանի հովանավորությամբ և Ներսիկ Ստեփանյանի, Դրաստամատ Տեր-Սիմոնյանի ու Ակսել Բակունցի ղեկավարությամբ գործող «տրոցկիստական նացիոնալիստական տեռորիստական կենտրոնի» արդեն իսկ ձերբակալված անդամների մասին, որոնք ոչ միայն վնասարար գործունեություն էին ծավալում գրական ասպարեզում, այլև նախապատրաստում էին ահաբեկություն կուսակցության ղեկավարության դեմ»:

Չարենց-Բակունց կապի սրման կապակցությամբ 1937-ի մայիսի 30-ին Ամատունուն հղած նամակում Չարենցն ստիպված է լինում հայտնել. «... ես ահավասիկ երեք տարուց ավելի է, որ քաղաքականապես, գրական, անգամ կենցաղային առումով սահմանագծվել եմ Ակսել Բակունցից»⁵⁹:

Բանտային հարցաքննությունների ու դիմումների մեջ նույնն էր ասում նաև Բակունցը: Չարենցն ու Բակունցն անձրպետը գիտակցաբար խորացնում էին փորձելով մեկը մյուսին սահմանագծել քաղաքական մեղադրանքներից:

1937 թ. հուլիսի 2-ին համագումարի վերջին օրը, փրկության հույսով Բակունցը բանտից երրորդ դիմումն է հղում ՀԽՍՀ ներքին գործերի ժողկոմին: Հուլիսի 3-ի վերջին չորրորդ դիմումն հղում է ՀԽՍՀ ներքին գործերի ժողկոմին և վերահսկողության գծով անդրկոմկասյան գլխավորական հանձնաժողովի դատախազին: Բակունցն ամեն կերպ ջանում է ապացուցել իր անմեղությունը: Ապարդյուն: Հուլիսի 6-ին Մուղդուսին հաստատում է Բակունցի «Մեղադրական եզրակացությունը», ըստ որի՝ նա «իրեն մեղավոր ճանաչեց» որպես «հակահեղափոխական տրոցկիստական ազգայնամոլական կազմակերպության անդամ», «հակահեղափոխական գրողների կազմակերպության» ղեկավար, որը նպատակ ուներ սպանել Ստալինին և Բերիային, «կազմակերպությունը կապված էր Մոսկվայի «Միացյալ կենտրոնի» հետ»: Հաջորդ օրը՝ հուլիսի 7-ին, ԽՍՀՄ գերագույն դատարանի գլխավորական հանձնաժողովի արտադնա նիստը փակ դատական խորհրդակցությամբ Բակունցի վերաբերյալ կայացնում է որոշում, որից հետո հրապարակվում է դատավճիռը:

Բակունցը դատապարտվում է պատժի առավելագույն չափի՝ գնդակահարության, անձնական ունեցվածքի բռնագրավումով:

1937 թ. հուլիսի 8-ին երևանում ի կատար է ածվում Բակունցի գնդակահարության դատավճիռը: Քսանհինգ օր առաջ լրացել էր նրա ծննդյան 38-րդ տարեկիցը: Նրա հետ նույն օրը գնդակահարվում են Ներսիկ Ստեփանյանը, Դրաստամատ Տեր-Սիմոնյանը, Արտաշես Գևորգյանը (1922-ին Թիֆլիսում ոճրագործ Ջեմալին ահաբեկված վրիժառուներից մեկը) և ուրիշներ:

Ըստ բանտապետ Սահակ Ասլանովի՝ Բակունցին գնդակահարել են Թոխմախ լճի շրջակայքում, գնդակահարողներից մեկը եղել է ինքը: Այդ մասին

⁵⁷ «Գրական թերթ», 12. VI. 1937:

⁵⁸ Չ ա ր ե ն ց. 1996, 341:

պատմել է Ալազանին և կալանավորված այլ գրողների, երբ ինքը՝ Ալանովը ևս, կալանավորված էր և համոզված էր, որ իրեն կգնդակահարեն⁵⁹։

1955 թ. մարտի 2-ին ԽՍՀՄ գերագույն դատարանի գլխավոր գինվորական դատախազությունն արդարացնում է Բակունցին։ Բակունցն անմեղ էր գնդակահարվել։ Նրա դեմ հարուցված № 4131 մեղադրական գործը կարճվում է։

Սկսվում է մեծ գրողի ետմահու կյանքը ...

Եզրակացություն

1933 թ. սկսած՝ պատմական հայրենիքը ոգեկոչող «Ծիրանի փողը» հայրենասիրական պատմվածքի պատճառով Բակունցի դեմ սկիզբ առավ գրական և կուսակցական մարմինների քննադատություն։ Այդ քննադատությունն աճեց, խորացավ ու սաստկացավ հետագա տարիներին։ 1936 թ. օգոստոսի 9-ին ՀԿ(բ)Կ Կենտկոմի առաջին քարտուղար Ամատունու օրոք նա հեռացվեց կուսակցությունից ու գրողների միությունից, մեղադրվեց «նացիոնալիզմի» ու «տեռորիզմի» մեջ և ձերբակալվեց։ Բակունցը բանտում մնաց 11 ամիս և ենթարկվեց բարոյական ու ֆիզիկական դաժան հալածանքների։ Գնդակահարվեց 1937 թ. հուլիսի 8-ին Երևանում։ Բանտում անցկացրած Բակունցի օրերի մասին վկայում են հարցաքննությունների արձանագրությունները հանրապետության ղեկավարությանը նրա հասցեագրած դիմումները և այլ վավերագրեր։ Առանձնահատուկ է նրա կոչ՝ Վարվառա Չիլիջյանի «Յուզմունքներ» վերնագրված գրությունը, որ նա շարադրել է 1954 թ. Բակունցի արդարացման կապակցությամբ։

Ա. Բակունցը ժամանակին մոլեգնած քաղաքական հալածանքների զոհերից մեկն է։

Բակունցն արդարացվեց 1955 թ. մարտի 2-ին։ Տպագրվեցին նրա գրքերը և «Երկեր»-ի (1972–1984) քառահատոր գիտական հրատարակությունը, նշվեցին և նշվում են նրա հոբելյանները, և գրողը շարունակում է իր ընդհատված կյանքը սերունդների գիտակցության մեջ։

Դավիթ Գասպարյան – բ. գ. դ., պրոֆ., ՀՀ ԳԱԱ պատմության ինստիտուտի նորագույն պատմության բաժնի առաջատար գիտաշխատող։ Գիտական հետաքրքրությունները XX դարի հայ գրականության ու մշակույթի պատմություն, Եղիշե Չարենց։ Հեղինակ է 80 գրքի և շուրջ 1300 հոդվածի։ ORCID:0009-0004-7317-4535. grakanaget gasparyan@mail.ru

ԳՐԱԿԱՆՈՒԹՅՈՒՆ

- Ալազան Վ. 1990, Տառապանքի ուղիներով, Երևան, «Սովետական գրող», 290 էջ։
Արմեն Մկրտիչ. Չարենցի և հարակից խնդիրների մասին. – «Գրական թերթ» (Երևան), 21. VI. 1933։
Ալեքսանդր (Ակսել) Ստեփանի Բակունց. Մեղադրական գործ № 4131. 1999 (աշխատասիրությամբ՝ Դ. Գասպարյանի), Երևան, «Հրազդան» ՍՊԸ, 192 էջ։
Բակունց Ա. 1984, Երկեր, հ. 4, Երևան, ՀԽՍՀ ԳԱ հրատ., 664 էջ։

⁵⁹ Ա. և գ. ա. ն. 1990, 64։

- Գասպարյան Դ. 2009, Ակսել Բակունց: Կյանքը և ստեղծագործությունը, Երևան, «Ջանգալ», 544 էջ:
- Գասպարյան Դ. 1994, Փակ դռների գաղտնիքը, Երևան, «Ապոլոն», 728 էջ:
- Գասպարյան Դ. 2017, Հայ գրականություն, գիրք 6, Երևան, «Տիգրան Մեծ», 736 էջ:
- «Գրական թերթ» (Երևան), 25. VIII., 12. X. 1936, 23. IV., 1. V., 12. VI., 1937:
- Հայաստանի ազգային արխիվ, ֆ. 1, գ. 1, ց. 16, թ. 62–66:
- «Հայոց լեզու և գրականություն» (Երևան), 2011, № 5, էջ 39–41:
- ՀՀ գրականության և արվեստի թանգարան, Գրողների միության ֆոնդ, № 16–17:
- Մկրտչյան Հ. Ակսել Բակունց, Եղիշե Չարենց և ուրիշներ. – «Գրական թերթ» (Երևան), 17. III. 1989:
- «Նոր ուղի» (Երևան), 1931, № 4, էջ 131–144, № 5, էջ 151–159:
- Չարենց Ե. 1983, Անտիպ և չհավաքված երկեր, Երևան, ՀԽՍՀ ԳԱ հրատ., 712 էջ:
- Չարենց Ե. 1996, Նորահայտ էջեր, Երևան, Երևանի համալսարանի հրատ., 636 էջ:
- Չարենցի հետ. 1997, Հուշեր, Երևան, «Նաիրի», 424 էջ:
- Չարենց Ե. 2007, Վերջին խոսք, Երևան, «Հայագիտակ», 328 էջ:
- Չարենց Ե. 2017, Գիրք մնացորդաց, Երևան, «Տիգրան Մեծ», 486 էջ:

АКСЕЛЬ БАКУНЦ – ЖЕРТВА ПОЛИТИЧЕСКИХ РЕПРЕССИЙ (1936–1937 гг.)

ДАВИД ГАСПАРЯН

Резюме

Ключевые слова: Аксель Бакунц, политические репрессии, задержание, арест, допрос, приговор, расстрел.

Выдающийся армянский прозаик Аксель Бакунц (1899–1937) подвергался критике как «националист» на партийных собраниях и в литературной печати с 1933 года. В расцвете творческих сил ему, помимо обвинения в национализме, приписали также терроризм. Писателя арестовали 9 августа 1936 года. А. Бакунц был заключен в тюрьму на 11 месяцев. За это время он подвергся жестоким моральным и физическим пыткам. 8 июля 1937 года в Ереване был приведен в исполнение его приговор к наивысшему наказанию – расстрелу.

Сохранились протоколы допросов Бакунца, заявления, адресованные главе республики из тюрьмы и другие материалы. Они содержат много новых фактов о его жизни и творчестве и помогают пересмотреть многие реалии.

А. Бакунц был оправдан 2 марта 1955 года. Были напечатаны его книги, научное издание четырехтомника «Сочинений» (1972–1984), отмечались и

Давид Гаспарян – о. филол. н., проф., ведущий научный сотрудник отдела новейшей истории Института истории НАН РА. Научные интересы: история армянской литературы и культуры XX века, Егише Чаренц. Автор 80 книг и около 1300 статей. ORCID:0009-0004-7317-4535. grakanaget.gasparyan@mail.ru

Summary

The prominent novelist Aksel Bakunts (1899–1937) was criticized as a “nationalist” at party meetings and in the literary press as early as 1933. At the height of his creative powers, in addition to being accused of nationalism, terrorism was also attributed to him. The writer was arrested on August 9, 1936. Aksel Bakunts was imprisoned for 11 months. During that time, he was subjected to a severe moral and physical torture. On July 8, 1936, his sentence to the highest punishment, execution by shooting, was carried out in Yerevan.

Records of his interrogations, statements addressed to the head of the republic from prison and other documents have been preserved. They contain many new facts about his life and work and help to reconsider many realities.

Aksel Bakunts was acquitted on March 2, 1955. His books as well as a scientific edition of the four-volume “Works” were published (1972–1984). His anniversaries have been always celebrated and the writer continues his interrupted life in the minds of generations.

David Gasparyan – Doctor of Philological Sciences, Professor, Leading Researcher at the Department of New History of the Institute of History of NAS RA. Scientific interests: History of Armenian literature and culture of the XX century, Yeghishe Charents. Author of 80 books and about 1300 articles. ORCID:0009-0004-7317-4535. grakanagetgasparyan@mail.ru